

太

函

集

太函集卷之六十六

新都汪道昆伯玉著

碑五首

彭令君紀政碑

彭令君治歙朞月政行乃筴便宜條上二事將與境
內更始爲後事師一議均輸一議制用其略曰歙廣
輪二百七十一里舊制分十五區區立糧長一人歲
主徵解其後紛更者起僉殷實而立收頭久之則彊
者侵漁弱者偏累弊滋甚矣姚令學閔至始革收頭
區定三人正戶一朋戶二上之不倍令甲下之不呴

民情境內便之部使者絜爲令而勒之石顧茲二百七十一里悉倚辦于四十六人以勞佚則不均或因空役而爲利以區里則不相統攝故多扞格而毀催科瑜不掩瑕非善之善者也好古始至將仍其舊日討其所未周歲當踐更必虔其始籍各里輪甲者務舉其贏博訪之面覈之里擇一人各徵其里其時徵解之法未及周詳自是輪甲踐更訪覈壹如嚮者予之期日按籍呼名參之輿論之公署定三等九則某戶上上某戶上中某戶上下若中若下率以是爲差諸上戶則職轉輸中下則職主守通計是歲轉輸之

費某項若干應用上上若干戶某項若干應用上中
若干戶以序揭書左个通計各上戶應供轉輸之費
某戶若干某戶若干以序揭書右个各項以序而解
各戶以序而承供不偷勞不遜疏不後蹙不先蓋壹
稟諸天謀而人謀非所預矣外是或以津貼爲口實
關及小民悉付士師毋所貸是則公平畫一經久可
行蓋一筴也故事里甲值月供應浸致濫觴甚則無
饜民不堪命 太上痼瘼民隱罷里甲而徵之官太
較陽爲面從陰不用命歛遵行自房令寰始躬節育
爲列邑先歲計千緡有奇猶懼不給費之不貲大者

兩端備用則以備上司支應則以應賓客其後議如聚訟務損減以博虛聲公用益煩公費益省捉衿露肘其勢則然乃今定備用爲五百緡支應爲三百緡亦僅僅耳額不加益而時可推移有不給則預支預支不給則取辦於來歲又不給不能再越歲而先資及今不爲之坊是未卯而求晨未及泉而求濯雖有敏者無所藉手乃今五百三百各有司存歲會其九月要其度懸書左右以便責成備用之需惟上所無庸議矣支應則司戶司禮從而中分一職授餐一職治具使桑孔而在惡能以詘爲贏嚴邑不衝傳

有稍食畢登其仞一吏尸之支應乏則於是乎取盈
又乏則取諸鈞矢月畢月補時畢時補補之必足秋
毫毋取預支庶出納有常無愆期無失事矣此又一
筴也二筴直取補偏救敝待命而行所部悉嘉納之
勒石於堂以示成事歛諸父老操敦史而抵太函則
以上酌民宜與邑人更善治者縣大夫事也下循法
守與邦人懷永圖者鄉大夫事也幸哉君侯爲令務
在宜民特書以詔方來則不朽之事公爲政矣夫利
不百不變法何論什全要以窮則變變則通浸假不
善變以趨時殆將舉一而廢百故天時有生矣變通

莫大乎四時且里甲相維今之制也等則從夏要會
從周稱物而施之平以羨補不足亦猶行古之道也
尊王師古寧詎自用乎哉君侯未及下車民間或鬻
產以待役及均輸令下告贖者塞門何以故衆輕易
舉故也預支未止噴有煩言及制用議行翕然從令
恐後何以故制節謹度厥有章程故也二者皆政術
也而心術繫焉昔之用民也輕越歲而預支者再猶
懸宿責將以遺後之人君侯自居其寒居人于煥過
自貶以彌縫其闕絕口不言其私此其心庶幾乎無
我之心也有純白之心而後有純白之政此其由本

也與哉昔人有言有治人無治法一筴則其法也君
侯則其人也苟非其人法于何有第恐增多役則多
事求多補則多門安得如君侯也者終惠元元以建
百世之利人存政舉故曰在人徒法不能以自行顧
心術如何耳

馬湖府安邊城碑

自漢通西南夷而氏羌邛僰莫不臣妾其後伺我張
弛叛服無常今上始平九絲誓將寢兵息蜀及諸
夷竊發疆吏遞聞乃授鉞徐中丞假以便宜從事至
則謀之按部謀之藩臬大夫屬王將將諸將兵以次

討罪于時松潘爲急建越次之馬湖又次之丙戌平
松潘丁亥平建越中丞進右司馬主將而下論功有
差歲杪有事馬湖羣策羣力畢舉乃勒兵五萬爲三
軍則以李監司士達監叅將郭成朱文達兵出馬湖
以武監司尚耕監游擊周于德兵出中鎮仍以周監
司光鎬監遊擊邊之垣兵出建昌統以主將李應祥
殿馬湖營居中調度檄通判汪京等贊畫軍中司馬
爲師期期至臘首仍構黃郎雪坡諸黨盤據出沒以
抗王師三師並興討無不克自陳師以迄奏凱期月
有奇俘斬夷酋二十八人夷黨四千七百四級討歸

侵地六百七十餘里納降五千二百三十八人捷聞
三蜀底定乃策諸監司爲善後計疏奏之則以王者
之治夷羈縻而已夫治夷猶治草也兵舉則薙兵罷
則滋彼其錯我域中視戎狄異藉令弃之若置滋蔓
難圖將爲永圖其自今更始請就馬湖府專設安邊
同知一人守備一人皆給印綬扼其要害築二城二
堡列兵三營戍之布恩信務脩和寬則因俗解紛急
則相機決勝責在同知察堅瑕偵向背寬則訓練急
則張皇責在守備及今天討之所讐服威德旁流既
畏且懷不啻革面示之以順則撫逆則誅文武並行

長久策也察部中諸郡倖無如通判汪京良是嘗轉
木尚方其勞未泯軍中宣力從事庶幾不二心之臣
及今擇而使之得人矣 上悉當司馬議京方徙寧
羌守尋授安邊同知乃就新鄉鎮築安邊城城九百
雉中城爲同知公署進五十里築城四百雉中城爲
守備司又五十里爲施家寨築一堡屯兵一營又迤
北爲水池築一堡屯兵一營邊隘相望築亭障者八
庚寅始告成事則遣使抵新都京藉寵靈幸得一當
邊境茲伐也 明德之所照臨也司馬之所決策也
諸分部之所戮力也使京得以褒衣博帶而當一隅

京不知所出夫子故在邦政將將善而善善長夫子
碑矣使至此中得驛書 上脩京轉木功進秩視二
千石往不佞爲襄陽守京故以受業及門其人負倣
儻急勲庸將有樹于雲中渤海之間雄視當世筮仕
得蜀別駕不佞惜之何哉固當授一令以佐百姓既
得一州牧不佞惜之何哉固當授一郡丞以治四封
乃今以安邊而丞馬湖則文武材也語曰文武不備
良民懼彼其無良也者將奚賴邪子欲居夷直以君
子居之耳必也躬化爲上非忠信篤敬不行乃若定
章程明約束播文告息紛爭詰戎兵拓土地抑末也

頃聞羌萌逆節將尋斧柯借以不治治之蔓無日矣
是舉也深入重地躬自守之非常之原則人人懼矣
誠能左提右挈兼用文武而與時宜先民有言禁于
未發之謂豫是則在師爲長子在夷爲君子久之胥
夷爲夏方諸漢德愈益昭明則所謂非常之人非常
之事非常之功也斯言也非不佞之私言也上之
當宁下之開府若分部諸監司望此久矣不佞其矢
之於七尺之碑

彭令君遺愛碑

余三仕楚習聞楚材屏居歛之市南習聞民譽歛得

令君二皆楚之良武陵君出有虞之姚其名學閔歷
歲五稔以凱弟得民和既就徵諸父老屬余碑之祠
下後十年所得陽城君蓋出有商之彭其名好古歲
五不稔躬胼胝切恫瘝其勞倍昔者什之庶幾乎民
之司命徵書至諸父老皇皇然屬余碑之邑中二君
猶之荆師則左右廣武陵過都猶歷塊壹出于康莊
陽城馳九折出羊腸超忽方駕此難易之辨也諸父
老所爲皇皇者意在斯乎余不遑更僕數之請得而
僂指其概故俗不患暴客則苦暴征縣故分十五區
區有長主部運官司第程督區長急則傾橐代輸以

越瘠秦秦無肥矣今令君議罷區長分里分甲就其中舉肥各帥其屬造應門籍而納諸外府部運則戶上上者領事中上朋從法行乃始宜民請絜爲令故事征繇有額費出有經往者闌出無章不足則貸來年之額又不足貸及三年防決而橫流不竭不止令君損供億自身始損厨傳自行部始損几筵筐篚自賓旅始損之又損百詘一贏歲再更乃可無貸往者猶以公事負諸賈悉代給之減其文勿暴其短故事檄行保甲率取應文新令未申伏莽者或竊發令君長太息毋令星星者燎原由是周行境內聯什伍儆

于振盜有左驗者必誅不則與之更始于是鷸冠皆
解淵藪悉夷丁亥無年戊巳滋甚民間不殍則疫甚
者闔戶僵尸比及庚寅災者半疫者半始饑則四方
遏糴令君告急諸司既貸筦庫數千金遣庶人在官
者搜粟而買灌輸入境平價糴之浸甚則計官穀若
于庾官錢若干緡社倉若干鐘侵者若干黼循行邑
里省視夫家即溽暑祁寒不避架阻里中待盡者待
哺者待醫者若而人富菽粟者富刀布者若而人畢
出受令與饑民約移粟賢于移民人授一繻差有等
吾令掌計者給錢若穀而歸吾繻諭諸富民公私毋

罪歲自昔策救荒者其下設糜要以力易辦惠易究
澤易周則今之上策也吾民可以義動夫非而隣里
鄉黨乎哉有亾相通古今大義顧從義何如耳會

遣禁掖使者出賑江南令君會計中外公私參之民
數一月一賑不數不疏首官倉次社倉次公羨次富
民錢終以內帑畫地爲饘粥月給春糧終則赴義者
設之及秋乃已疫者給藥物死給之棺先後行縣者
四周家至人益公無蠹私無饕雖枵腹人人望矣迄
于辛卯乃大有年先是邑人聚族而謀部檄至戶籍
且更造燭照數計宜莫如今令君願借一以定版圖

百年之利也開府以爲敏檄監司如邑人言令君
席三辭無寧見卯而求時夜疇昔經野之籍至今曉
曉此殷鑒也既則翻然曰往吾蒿目域中凡諸衆寡
彊弱存亡肥磽羸拙私籍之篋一眄可得大都浸假
避難徒用心于無所用吾不由也遂出次虛舍爲程
期期至則待命臯門日核九甲來無壅歸無留按舊
籍丁以千計者七以萬計者三概而分一丁已當五
斗故所疆理邑西牧爲腴北次之東南鹵矣此其大
氏也乃今西北不耐無腴準故額無所加爲裒益西
北丁當七斗餘遞減有差或有加者不以糧則未富

也乃若列戍百工之族其丁滋多多則不任率損其
什一一夫赤立地無立錐猶然錮以一丁憺矣彼已
無預主撮率損其什二三籍目既張會徵高第遂具
草上之監大夫部使者監司二千石其以是爲綿蕞
也者以俟後之君子戮力成之嗟乎昔言與民慮始
爲難樂成難矣先是言令不便者則曰昔在令甲大
司農授節十五區脫有所難惟是什伍人委之耳乃
今里里區也甲甲長也利不百不變法其謂是與顧
力分則輕輕則易舉以故富無偏累貧無苛求法固
善也其後言令不便者則曰古者計口任土惟正之

供先王以民爲天民以食爲天交相重矣誠使糧有
餘則丁加糧不足則丁減是糧爲政丁徒受命于糧
吾惑矣且令君不法其故因糧生丁有如一且糧亾
丁則誰豁是二缶惑也乃其紆不析之籍蠲不毛之
丁則小惠耳聞者曰固也戶籍惟主者及其孥必躬
秉耒而易之非百其身不給彼其耕者耘者穠者莠
者町畦者防閑者桔槔者穡者塲者何莫非丁不籍
則亾亾于何有民治莫善于周禮一曰安富一曰恤
窮安富固將以恤窮恤窮亦所以安富一道也易曰
窮則變變則通張弛自如務中其節今之視昔後之

視今心有同然者矣此後事之師也狼顧何爲諸父
老曰善哉吾儕所爲皇皇者此也竊惟諸相國由漢
而下蕭曹爲魁一規一隨坐致寧壹令君內聖外王
之業守博士舍者二十八年即不以刀筆少蕭曹不
同道矣始至吾見其廣大吾見其高明意恻然下之
天下才也及其議催科議經費議弭盜議賑饑議版
圖議戶口精者離牝牡微者察鷦鷯概諸中庸無容
吊詭操是道以往言足以興以此爲隨隨有獲矣他
若部署同官分曹受事右儒行興人文聽五辭絕五
間平市價剔神姦碑所不周悉在道路之口畏壘之

尸祝寧足張楚乎哉

攝司事裴公德政碑

自伯主以內政疆齊即王者起率治鹽筴以紓國用
今制大司農歲入四百萬取給鹽筴者什二三淮海
當轉穀之樞輸五之一諸賈外餉邊內充國戮力以
應度支顧歲計率三五以爲期羸得茲薄第時至則
市原大而饒其徒坐享素封齎用奢溢即有瑕壘目
攝者務毛舉之及其不支尾解勿恤抑或姦萌滋起
扞文罔以干利權斯其爲賤丈夫將不容于阜民之
世遷怒者或擊一鶚而掩羣雉不已甚乎頃年遣紀

綱之臣脩畫一之法顧豐城怙寵南海恃才不決裂
則紛更商益困而國無補夫利不百不變法故君子
不盡利以遺民彼其反裘負薪諄矣在憲令歲遣執
法使者爲監大較治鹽如治絲急則焚矣及其按舊
章采輿論歲盡如馳始得其町畦業已及瓜而代無
及也夫以鹽鹽瑣屑細若秋毫即桑孔執籌驟難得
其全體而况議法者猶逆旅執法者猶寓公可趣辦
哉寓內六司淮海尤重司有使秩視亞中貳以同知
視二千石不貳事不踐更既久且專宜辨此矣辛卯
歲之杪使人計當行所部故右裴公則以亞攝長公

習典故審便宜議上部使君其應如響諸賈舉欣欣以爲天幸庶幾乎有瘳宇下諸耆舊若而人相與誦公德政大者莫如罷新科仍舊貫其概有三故事場鹽灌輸而壘揚州既復運真州聽掣有羨則割課額之仿徵價類解太倉其後揚州自河出灣委官驗引引符輒放無留行近始立法抽掣之以議闡出當事者建議抽掣踰額則併鹽引入官非法也公受事請罷抽掣第驗引如初故事部出引塲出鹽引則守支鹽則買補顧有塲必有引而有引不皆有鹽有無相通卽以此引而支彼鹽引易銷鹽易辦於筭便當事

者建議毋相假借必分場坐引支鹽于時坐場無鹽引悉據格鹽多引少鹽亦停留非法也公受事請通融如嚮者偏痺始蘇故事先驗引而後掣鹽自南海始引利廣布必稽掣以縻之是謂朝三取具數而已于時甲操乙引乙津甲錢第從輕科是爲兩利當事者建議引必自名罔上應文不讐而不可爲也夫力有贏詘時有變通察見淵魚不祥殊甚故力詘者不振藏者不孳非法也公受事聽私貼無所問從者如流乃若定程期趣捆載將欲居奇待價毋敢稽程重以禁海販杜無良賑竈丁先無告凡可以通商足國

義不避難當路推轂居先無慮十數積金部納歲課
三十萬不爽錙銖本之以羔羊素絲純白備矣比及
三載公當質成諸賈叩所部固留幸而得請不佞聞
是語于鄉黨心竊竊以爲難世祿之家鮮克由禮則
承家難不習爲吏視已成事則習事難匠不代斲祝
不代庖非其任也則攝任難公高曾通舉明經祖禰
通舉甲第公以景胄五世其昌有如自負高陽惡取
世濟公食舊德率履無愆承之以謙任之以直其言
閭閻侃侃其政蕩蕩平平因革弛張莫不中節一難
也清豐以廉得民高大父也吳橋以孝得民曾大父

也大宗伯以文治十萬戶以武功則祖禰也要以循
良代起文武兼資殆可觸類而通儒者之能事也公
績大宗伯之緒歷後軍大夫子庶士若子庶民壹稟
禮樂詩書以佐軍政朱轂而出乃在鴈行子而翼者
五方之民子而哺者九邊之士由是而纂舊服不亦
弓治乎哉顧煮海用織輸邊用鉅雖有目力寧詎能
察鴈鵬而絜鯢鰲彼其爲煨燼彼其爲土苴言殊器
也大道不器是謂通材二難也有虞攝君東魯攝相
唯聖者能今之攝者不然或跋胡或蹇尾善則身爲
之後不善則身爲之先寧爲尸居毋爲夸父寧爲伏

握母爲追風無琬無琰幸而無瑕足矣公志氣專壹
去驕去矜平易近人去泰去甚其握算若巧歷其中
命若中黃其導利若決江河其議是非若辨懸寓同
之則同無駭異異之則異無雷同此三難也語曰部
婁無松柏斯徂徠新甫之產與諸耆舊調古有鼎銘
銘其先世今之碑猶鼎也誦功德猶銘也七尺之石
亦足以師後事而志不忘司馬既得公三難兼得公
五世故嘗游大宗伯公則聞孫司馬碑矣公名述祖
起澤州世家始以當戶命之名名稱情矣

重脩度門寺碑

震旦五宗始分南北皆自黃梅入室一用裸一執幡
要之覺有後先成功則一南宗之師曰大鑑北宗之
師曰大通自衣法指南壇經首倡有學率左袒而主
北無學輒右袒而主南其徒遇若交綏守若分壘顧
教有頓漸性無成虧鏡懸則景全頓也非漸也日至
則果熟漸也非頓也大鑑得之般若不涉階梯大通
得之楞伽不容毫髮當其時居爲首座出爲帝師顧
獨推轂南宗退然而避上舍年踰久視終世忘言其
無際若須彌無量若阿耨深若龍藏閎若蟄雷大鑑
先登大通瞠乎其後北徑南而始極南規北而始圓

南即冢君北亦不失爲貴介高談者率任耳而區別
蓋嘗覩大方而未盡邪往肇林作無遮會誨公與大
比丘四十八人俱余故以多聞多公未竟也其後函
中作華嚴會誨公與四衆俱余故以神解多公未竟
也歷七年所其年壬辰公杖錫西來發自荆楚自述
其閉關衡岳深求般若楞伽默識真參證不二法既
度度門遺址爲唐勅建大通道場蓋舍利于是乎藏
歸然張燕國之碑在沙門不守沒於民間善男子胡
如松恢復之是爲母氏外弟迄今鞠爲茂草乃在父
母之邦自我而失宗祧非法嗣也遂循乞法王子長

者子大臣身宰官身居士身施五百緡拮据經始卽
未能光復舊物庶幾堂構一新方外之政在君侯願
勒豐碑紀成事余聞有德司契世方尚右而公左之
大邁無方寧以一隅作所右無不有左無不宜由方
廣而得圓通則上德也公操左契而務自下殆亦列
方爲圓雖然猶有激也五祖授般若言言佛言能者
得之得之心得之佛耳大通登座書偈要亦有概於
師心鑪錘之間含光承景具在吾道南矣其徒擁赤
幟以行猥云教外別傳無用言語文字唾諸佛言如
糟粕味諸語錄若醞酬筆輅柴車虛張警蹕匹夫何

罪罪在無將五祖業已前知永止法止自是而後從
者如流或捨榆枋或出蒼莽自以爲飛之至也惡能
涉九萬而南邪大通不言躬行漸脩頓悟方諸普賢
行首迦葉默存日計拙而歲計羸徐行可跂捷足退
無卻步進無前途無生而生無住而住楞伽即般若
般若即楞伽斯其不二法也往從幼學誦法仲尼其
曰無思無爲無意必無固我無可無不可即西極至
人何加焉自志學而迄從心歷階而進下學上達固
非虛言顏氏庶幾則良冶鑄之矣曰非曰勿其滓未
融迄于坐忘駸駸乎未見其止忠恕違道不遠曾氏

得一而守吾宗浸假與道合真彼亦一真也此亦一真也非道非非道道在茲乎儼于其倫顏則南曾則北矣宋儒務以佔俾求道主聞見而隸心知東越起而一洗之獨秉良知爲皦日其徒憚煩而趨省操說鈴爲玄珠正行則躓旁行則流齒以元公伯子鴈行或未之逮大通則鑿和也斯足以驂一乘否則南北分岐亾羊均耳是舉也斯道其中興乎猥以曲儒惡聞至道道無名數非一非三彼之則異端我之則全體無端何異彼自不生無體何全我亦不立誨公得我心之同然矣度門里事督命東林惟公總持法門

龍象從公至矣

神道碑二首

明故正議大夫資治尹南京工部右侍郎新城
方公神道碑

上紀元壬午秋九月甲戌故南京工部右侍郎方廉
考終新城有司以聞 卹如典任子城奉 諭舉葬
事得兆天柱山之陽則以吳人周天球所爲狀抵刑
部右侍郎王世貞爲志爲銘奉淑人羅以祔甲申春
正月 上遣藩大夫祭之於是城述 制辭若狀若
志若銘抵不佞道昆勒碑墓道方之先世著嚴陵白

雲原建炎中則以世醫著都會其後率守世業不儒
則醫至公高曾徙新城逋以醫師著先後以儒著者
在唐則處士于在 國初則徵士質以文學起新城
訓邵武諭建寧者則貢士源源季父詮母弟溥皆造
士源爲公大父是生公父模模故受醫錢淑人首舉
公而公善病即在外傳暱不程功公無煩父師孳孳
受業既則以居邑草昧無繇得師遂入省從明師遊
愈益攻苦比還邑省覲率徒行或病其勞則曰吾虛
往實歸徐行二舍得腹藁一篇吾固耽此不爲罷耳
形家言新城學宮不利請遷城北多福寺更之寺僧

持之彊縣官不能絀沙門洪聰夢神人語有社稷臣
當出是土第勿爭既竣工公以庚子與計偕入闕
下明年辛丑召對公車除江西南康府推官主無
害折郡獄如迎刃砉然而中桑林所部以爲良移旁
郡獄皆就公治部使者行縣必公俱公操法平無枉
撓既迎父養郡舍父以天年終貧無以喪賴上官賻
至始舉歸葬王爵舉公卓異下徵書服闋始入朝例
得臺諫公謝王爵廉何敢擇官如必及廉言責非所
任也乃受祠祭司主事歷主客司員外郎精膳司郎
中太上有事齋宮罷朝餘十年所公時時帥諸同

舍討朝儀同舍或風公即堯舜無所用垂衣安用綿
蕞及庚戌虜入世宗猝臨朝公面太宗伯上朝儀
循行無所失時雲間徐文貞公爲太宗伯心獨多公
會島夷數寇吳雲間首及於難太宗伯言之太宰則
以公出守雲間公至增陴深塹以壯憑陵列亭障宿
甲士以張犄角寇數萬薄城下公率以暇應之城內
外恃公以爲安而甲士間出奇倖伏莽寇無所逞乃
奔公以上海故無城再被寇議亟城上海徇里市而
戶曉之無城無民室廬囊橐何有有衆悉輸公府公
躬巡工城成朝登陴而夕禦寇寇無所逞乃奔公左

顧而伐寇謀右顧而詢民瘼亟請停征發寬田租郡
事故繁多弊藪會兵事起羣小聚而叢奸公畢餘力
一振之其去如落遂以良二千石 賜金綺尋遷江
西按察司副使備九江傾郡遮道留公卒不可郡邑
相率置祠事迄今俎豆之九江當楚蜀下流會 縣
官有殿材之役公薙萑苻毋號澤飭六傳毋稽程無
何進廣東布政司左叅政會嶺北有三巢之役率倚
辦公當是時大宗伯業已入政府適江南撫臣當更
置首推轂故雲間守補之 上以爲然尋進都察院
右僉都御史治軍督儲如故公以兵荒代至民將不

堪抗疏數千言直陳民間疾苦於時得減賦百餘萬
不啻出民溝中乃汰冗兵併治兵使者請專設大臣
治水利爲國家善外府謀實其言則黃石盡尋進右
副都御史入楚都人士依依如雲間爲名高者或以
摘發借公名公行矣 穆考即位起南京大理卿未
及下車尋遷左副都御史總督漕運督理淮揚諸郡
故事中貴人守 皇陵者闡受民詞公按 制令禁
止之罷勿受及公以便計得請漕如期故事徐州卑
出丁夫任二洪役公憫其偏累則省漕司米易價募
之請留徐州商稅以佐河工罷如臯屯兵以蠲坐食

歲計減損踰萬絜令爲常會 覃恩贈大父父並左
副都御史大母母若妻並淑人尋轉南京工部右侍
郎羅淑人即世三引疾請老許之疾既平公始治家
政仲弟少府炬季弟典儀秋左右杖屨怡怡然與之
偕日討諸子姓而訓之先禮讓而次文藝乃治家廟
葺先塋拓墓田脩宗譜於是五宗雍睦門內外無間
言既而曰若國士則吾不能吾其爲一鄉之士邑中
田賦多飛匿上書檄均人經之歲大侵請縣出倉粟
以賑慮其不任而中道殍則又出私粟作糜鋪之松
葛二谿當巨湧之淫囂堤梁悉圯公倡衆厚築堤以

備水溢甃石梁數十丈爲青雲橋新鄉先正許公達
祠脩縣志斤斤務持大體庶幾振既往而詔方來丘
里州閭靡然顧化公年七十乃置高會召諸近屬周
親比各盡驩卒爵而語之曰今而後吾將不與賓客
事矣先期舉曆卜日志之心及期則命子城慄衆鄉
以傳百體既而就枕屏家人勿多訊以擾吾神卒無
遺言瞑矣公息子二長即城納婦凌次應耆字鍾氏
女四長適太學生鍾應星次適南京右府都事俞希
范又次適諸生徐正蒙周吉士孫男女各一人不佞
夙嚮往公已復寓公宇下當公家食神人業以社稷

臣命之顧位不過侍郎澤未及天下不讐何居要以
特立端行功見言信古所謂居其厚不居其薄處其
實不處其華公其人也謂之社稷之器誰曰不然藉
令異日者書名太常野史氏請以是碑爲左契

明故中憲大夫陝西按察司副使贈通議大夫
禮部左侍郎兼翰林院侍讀學士中巖李公神

道碑

世宗骨鯁之臣則李御史封事特著時羣臣以議禮
議獄忤上旨非謫戍則編氓御史請寬之疏上不
下人言御史持大體至是始有言其將爲鳴鳳邪今

歟矣御史名鳳宇鳴叔故云疏卒留中置御史勿問
君仁臣直御史幸獨完其後仲子歷水部尚書郎董
重城三殿之役公老家食獨與冢孫俱辟呬而詔冢
孫龍門家世受史爾高王父起家良史拜南秩宗自
任子以及曾孫皆服官守非故業矣爾以玄孫當戶
其無讓焉其後冢孫亦由太史起家貳大宗伯既入
南省紹介而命不佞道昆昔在金馬門習兩司馬乃
今幸典禮樂以奉 高廟得交右司馬驩高王父堂
坊之碑業已得請維先王父墓姻氏熊祠部志之銘
之長春備在通家謹布狀左司馬爲王父表在 令

甲爵三品以上馳恩與祖禰同少宗伯行且上儀
譽命上延祖禰異日者不佞將爲神道碑矣何表爲
頃之少宗伯獻質 當宁最之擢禮部左侍郎兼翰
林院侍讀學士于是 誥贈祖通議大夫禮部左侍
郎兼翰林院侍讀學士祖妣由孺人而贈淑人贈父
如祖母朱由宜人母王由太安人皆贈淑人無何少
宗伯進大宗伯復紹介而命不佞願脩成言不佞敬
諾按狀若志李氏出楚公安別祖溥德舉室西遷得
蜀富順再世爲贈侍郎志聰三世爲贈侍郎繼宗則
公高曾也四世爲大宗伯本五世爲贈御史文昌則

公祖福也弘治己酉贈孺人胡始生公贈公從事中都公在外傳幼彊記日誦數千言孟太守俊大奇之爲公延師授業公受詩教務心得屏舊聞諸四方說詩者響應之即匡衡可作矣正德庚午與計偕己丑始對公車由行人擢湖廣道御史巡視都會輦下多中貴人居公持之彊無所撓巡視倉曹河運遍畫便宜尋奔贈公喪起河南道御史上書不報予告歸既以福建道御史入臺中出按畿內始行部斥墨令大甚者四人東巡永平旱甚乃出深文者十數辟破械爲之平反境內手額呼裨君是夕雨連數百里諸權

力遍以棹楔窀穸請公念時詘悉格不行 上數詣
山陵治行宮以待駐蹕既告成事巡工者例得異等
遷公辭出爲陝西按察司副使分治漢中部部畛楚
蜀伏莽易興公勅疆吏嚴干掇募力士祛虎患豪右
分據沿江沃壤食而不征公下令賦百一於官一備
歲荒一裨士餉居常務寬文法釋不辜部使者左之
則以爲過縱公太息曰臣受 帝命帝受命于天天
帝好生吾安敢衡命吾從此去足矣歸而化俗務崇
禮修睦以亢宗四禮則重婚姻四仲則脩廟祭祭之
日必宣家戒令子弟聽之仕者無論崇卑以墨敗者

勿入門內外親以貧乏告饑子粟喪子楷婚子禽仲
父國昌李父孝廉世昌諸子孫浸微賴公以給公性
卞急季年益不可干要以易直慈良無改于其舊構
中巖別業治樓居召故人厚善者與之游于然樂
也庚申季冬公即世期而祔大宗伯葬鯨谿之原公
受室於嚴舉子方升納婦曹歿而不嗣僅一息女方
至納婦淑人朱媵陳三舉子方正婦劉方巡婦熊即
祠部女也方捷婦甘媵史舉方苞婦郭韓舉方懋婦
吳方至以積勞不賞量移趙州今贈矣息子即大宗
伯娶於甘余同籍比部君茹女也息女三其婚媾皆

仕族公門五世軒冕不啻隴西且得故大宗伯爲祖
今大宗伯爲孫或輓之或推之則岐山之業也重以
危言震主即古之遺直何加焉繩武貽謀由此其選
不佞既勒之石且系之銘銘曰職司言責與其隨也
寧激翹君而彰與其忠也寧良有道如矢批逆鱗而
無死世篤忠貞宜後昆之代興鰲谿之墟厥有尚書
臯如宰如斯其宗伯之幽居

大函集卷之六十六 終

太函集卷之六十七

新都汪道昆伯玉著

墓碑六首

明故提督學校陝西按察司副使信陽何先生
墓碑

當世以作者名家必首何李何則學士所稱大復先生何仲默云往聞先生將終屬諸弟子必李獻吉銘吾墓諸弟子不果聚族而私爲狀爲志爲銘其後數十年門人喬景叔始爲何先生傳概舉其質行著者載傳中又數十年先生有孫洛文守太子中允將

脩闕事屬余爲先生碑余從諸後死者尸祝先生顧
得逮事爲幸即無能爲中允役其何敢辭先生家信
陽世有秩莖莖母李夢赤日而娠及舉而命之曰景
明始能言輒彊記六年能聲偶八年能文里師謂何
氏子童而神遍避席去年十二從父會寧永信官臨
洮臨洮守召授春秋奇之甚居三年而父謝去貧不
能歸守帳具祖先生於郊車馬畢具既就舍受伯兄
景陽尚書尋以尚書籍鄉試第三人年十五耳先生
翩翩然非也業已善詩善書出人則王公大人爭迎
致之幸一見越三歲舉進士授中書舍人獨憂國秉

下移力請告寺人瑾基諸在告者矯詔例免舍人於
家瑾誅用大學士李文正公薦起則仍舊秩直內閣
侍經筵久之進司封員外郎侍直如故守中書餘十
載始以副使督學陝西無何病歸歸六日卒時年三
十九先生幼清蚤貴人人且旦暮卿相之卒之年不
及彊官不過二千石惜也初獻吉崛起北地倡江東
歷下二三君子講業京師先生至大悅之相與道古
遂駢肩而進先二三君子鳴其論世則周秦漢魏黃
初開元其人則左史屈宋曹劉阮陸李杜都人士所
膾炙者宜莫如彭澤宣城昌黎先生宣言古文之法

亾於韓詩弱於陶亾於謝朓睨千古直與左史屈宋
曹劉阮陸李杜游世儒率溺舊聞弗入也及得兩家
所論著者肱篋而擬議之於周秦漢魏黃初開元之
間始相顧曰誰謂何李不馴古之人也於是聞者響
應莫不傾耳聽之兩家遍爲栢文執旗鼓號天下矣
獻吉兢兢尺寸非規矩不由先生志在運斤斲輪務
底於化于時主典則者張獻吉主神解者附先生要
諸至言各有所當顧其相直若繩墨而相濟若和羹
即言逆耳而莫逆于心耳視者弗察也今兩家並懸
書海內不啻戶說之浸假得終其天年先生化矣即

先生以文學顯顧其義甚高初入中書輒上書許襄毅所極言嬖人用事公等務操正義撓其權乾清宮災嘗應詔上封事則又極言義子邊軍番僧諸不便狀疏留中不行聞盜起河南會文正公請老先生謂非大臣義書讓之瑾故憚獻吉名高嘆獻吉先生書抵文正爲獻吉地且介康德涵居其間瑾意平乃解及獻吉對江西簿獄且成先生獨上楊文襄書直獻吉幸臣錢寧冒賜姓目攝諸公卿獨以古盡求先生詩待命終歲卒不予中官廖鵬柄事嘗賄師御史館先生醖諸客購他材力邵鵬所賄者鵬弟鸞席鵬寵

填陝以西諸叅隨騎遇藩臬大夫無所問先生塗遇
騎者輒就馬上縛之乃若使滇不納餽遺居喪不禪
不飲歷仕十餘年不問家人產死之日囊中僅三十
緡即其孝廉足多蓋天性也景叔又言先生博物旁
通天文地理陰陽律曆諸家末年將輟脩辭務經世
爲用先生已矣戊辰夏六月不雨至于秋八月及先
生卒其日大風雷雨作晝晦冥嗟乎歲在龍蛇泰山
梁木阨矣先生言行載名臣錄鄉譽載中州人物志
其學政在陝西通志其家世則已詳墓志中碑不及
詳碑其大者如此汪道昆曰儒者言皇帝王伯相推

若四時秦終歸餘漢優端矣出唐宋而迄元季迭相
竭而歲終焉 大明開天乃復更始漢文以清靜致
刑措熙熙然春乎洛陽少年爲漢作始未駕而稅其
如通達國體何孝武表章六經兩司馬並起卽盛矣
美矣伊誰始邪明在 孝宗春之府也漢承挾書而
得賈董明承十世之敝而得李何先生與賈爲徒而
中道並夭其有不同者幾希顧漢沿周而去道近漢
之後無文矣唐之中無詩矣兩家興廢繼絕其爲力
難卽末流誰能不波疇敢登諸十載之上要其功則
李何茂矣嘉靖以往何論建元元封禪而祖之其爲

司馬者非兩也而中允起當尸其斯爲奉冢祀者邪
中允有當于不佞之言遂屬吳人周天球勒之石

明贈承德郎南京兵部車駕司署員外郎事主
事江公暨安人鄭氏合葬墓碑

今天子紀元癸酉日在玄枵貴州左布政使江珍奉
其父贈承德郎南京兵部車駕司署員外郎事主事
毋安人之殯合葬瑤田新阡明年春珍遺書不佞則
以里俗溺堪輿龜筴避忌紛紛卽間右高門率累世
不葬考終嘉靖己酉妣先考三十三年妣舉兄琇珮
璫若珍四人繼妣張舉二弟瑄璐凡六子乃今爲孫

者十有七爲曾孫者十有九玄孫三中外食指百矣
珍數更卜其後乃得瑤田會伯兄力贊之舉室議合
遂諏日樹墓徵志不遑幸大事終願吾子碑而銘之
矣不佞唯唯江爲齊梁苗裔故姓蕭唐廣明中故丞
相邁子楨渡江避地始易江氏家篁墩楨葬溪南中
子鄭任居守凡諸江署郡邑者率祖溪南及處士浩
娶于吳舉駕部公爲仲子公字大用名才生三年處
士卒而鄭氏姑女駕部是爲安人初駕部迎安人歸
獨舁在駕部從兄仁習里中賈安人婉婉奉姑驩退
而辟纊終夜不輟姑戒安人勿亟安人謹謝姑自是

篝燈績如常姑弗覺也近屬爭立後訟二十年及太守彭公當駕部後駕部弗欲歸而謀諸安人安人請捐之衆以息爭因後人而爲利非夫也太守善駕部衆乃平駕部從兄客錢塘服下賈復不利仰天嘆曰丈夫賈則賈耳固當擇地逐時固不在大寧能規規然析薪而爨數米而炊乎遂辭其兄北賈青齊梁宋業日起歸而治鹽筴錢塘駕部既饒安人纖儉如故獨置產輒溢價毋噉貸者心歲儉輒減田租毋乘歲爲厲門內親有急必抵安人人言非直駕部外賈良即安人內助良矣中官畢真出鎮浙牛羊用人駕部

陰屬二子徙業廣陵母及於難及駕部歸歛同時諸
賈往往坐株連駕部察叔季才程督二子就學吾先
世夷編戶久矣非儒術無以亢吾宗孺子勉之母效
賈豎子爲也比在外傳供具悉出安人安人暴終不
瞑叔年十四拊棺擗踊而號誓必以叔季當母心安
人瞑矣其年丙子春秋僅四十三頃之二子並受博
士詩士譽籍甚瓘卒以病廢去而脩古爲名家歲甲
辰珍舉進士受高安令稱最 召入南宮爲郎駕部
猶及親見之卒年七十五喪畢珍乞補南京戊午上
程書始得贈父母如令甲往聞鄉大夫狀駕部而不

力臣集 卷之三
佞亦嘗狀安人其實行往往可書狀具矣夫以駕部
安人爲父母得叔季而子之得全全昌猶之耕獲留
畚耳所不足者豈顯榮福澤乎哉顧安人不假年駕
部不逮命叔脩而不試季試而不終稼什而穡二三
則瑤田在取盈于後可也不佞旣勒之石復系之銘
銘曰相門帝胄棲南土繫姓于江都鼻祖丘木林林
江之濞支分郡邑滋蕃庶 高皇首善恢三輔聲教
洋洋百年所藐諸襁褓當環堵夫梁婦孟同攻苦千
金胼胝歸良賈翻然引身違罪罟授經二子傾章甫
母氏裕綈中道阻矢心不瞑如銜楚所不服膺夷廐

暨稱詩叔氏嫺齊魯季子蜚聲齊天府百里高安歎
且儻三禮典司相屬武天遺耆老終難怙九原被命
延簪組方伯駸駸西南部有懷不寐封堂斧瑤田一
抔如覆釜背壬向丙剛以撫神謀允協人無迕居然
偕老成千古子孫緝緝陳雕俎於萬斯年享純嘏

明故詹處士配吳孺人合葬墓碑

詹處士之喪舉有日矣仲子將奉大事乃徧謁諸名
家于是弇州王公志之銘之次公誄之台州王公表
之具矣仲子則以先慈倍孤且久蓋葉葬者二十有
五年茲舉而祔先府君無所稱載敢以合葬之碑抵

司馬願借一以四三王不佞於仲子爲通家敢不敬
諾往余嘗爲處士傳詹之先世具傳中其高祖故以
魁岸亢宗葬舍後弘治庚申五月四日子之半墓上
有氣亘天如五色虹是日處士生蓋其應也孺人吳
之自出長處士者二年其生也細而睽吳丈人以爲
寢筮之遇蒙之九二占曰吉宜有家處士父曰里士
公長不滿五尺處士魁然頎類高祖聲如洪鍾始從
少年遊盡得少年諸伎即騎射技擊博奕蹴鞠投壺
不習而工嘗從諸少年角獵其獲不私角飲其終不
亂既而耻與亂者伍去而爲壯遊乃從邑人汪生受

醫從楚人揭生受葬法既得其術終不售其巧而輕
嘗之年十八則又去而買漳州會竊金者伏辜仇者
搆里士公執之縣悍令坐里士公抵死舉室無少長
悉收之處士自漳赴縣中白父寃狀令持之益力語
侵之令大恚挺之五十孺人危處士間行而謁吳丈
人于家泣曰有如翁死令壻死翁女無死所矣女聞
父善青陽令青陽令善令君誠能得之青陽則生否
且俱死令業已壯處士比青陽令移書至乃罷里士
公處士既以能子聞益折節爲孝養母吳疾親爲之
嘗糞疾乃平及處士之湖陰母捐堂背孺人躬執喪

事外盡禮而內盡哀處士匍匐來奔喪具悉具無遺憾于時伯兄耄矣獨處士主卜求馬鬣封形家附耳言利居右處士叱曰右吾利也無寧不利左乎乃更質堪輿必兩利而後從事既葬雪浹旬處士露宿藥裡間歷三月而成乃就舍夫既以躬行取重間里咸就之質平處士絕口不言功或將爲壽終不忍獻歲穰務困積歲惡平買出之其所緩急者靡不周由彊近始殯外父母復其故地葬焉二子壻故饒既昏而富室耽者視爲口實蠶食之賴處士持之彊卒不失其舊三從子助鬻身傭作處士贖歸衣食之程督之

壹如已子助既有樹時能爲處士任勞處士脩五世
功將特祠高祖歲籍祭之飭息三十年所得百金出
而爲高祖祠助爲植處士勤而不倦既畢事而喜可
知孺人息子二人伯景舜仲景鳳處士笑曰吾故以
賈奪儒父命也舜何事其力賈以承家鳳何事其服
儒以繼吾志二子唯唯仲故以不羈自負恥聞博士
家言陰購古圖書篋之旁舍處士至佯入闔舍如老
生退則怯篋而出所藏左三墳九丘右經傳子史牖
下衡一几臨古六書興至則張赫蹏槃礴而作繪事
處士微得仲狀數之庭下而杖之大詎曰而翁不令

若賈者何日幾幾以儒術顯耳縣官非明經不論士
卽孔孟復起將必由之而懟而翁無寧懟人王仲始
屈首治經藝守功令者近二十年小試則雋大試則
否處士拊之曰無謂罪不在已孺子圖之孺人復歔
欷致丁寧勉之異日者吾不逮夫多仲子者則以其
獨秉全能夫才繫于世類處士之少也以技巧
傾百工工人製鰲山機具不發乃赴處士終夜得之
質明機滑而神行羣工自廢孺人婉婉耳眯于目而
辨于心凡身之所歷耳之所聞無不記憶里中舉子
女者率以時日告孺人其後議男女婚姻叩之如閭

史仲子奇才彊識夫有所受之丁卯仲舉內史部中
四與計偕竟不利其後用處士命亟發軔猶得及於
崦嵫王爵故矜仲才則授之南豐文學以胥後舉仲
故負時名且嫻吏事部使者出行部必載後車歷二
年車轍幾徧境內處士聞之喜非處囊安能出穎乎
無何末疾作長孫侍處士居庭一方士自外來舉案
而置盂水探囊出藥一匕置水中水立沸旋爲二黍
珠請曰吾聞長者義甚高乃今大期且至敬薦刀圭
二黍願益長者七齡第肩之與主之前七日乃服長
孫如期而啓有奇徵處士拊身退曰非常之原老夫

懼矣與其未達寧道其常壬午春王正月五日處士終天年八十有三憑几語長孫萬善次萬英吾大耋以令終吾瞑矣二孫遶牀而哭復張目曰若母聲吾將還大化先是正德中大疫處士闔門枕藉者二十七人疫既甚稍近則漸處士周視之手供湯藥卒皆起年四十八病中滿而溺不收仲宵衣侍榻前夢謁王者王者簿處士年八十二且然且疑比卽世越二日乃始立春徵之夢而信得正而斃母蹈不經則其天定也處士疾革豢犬自流塘赴城北伏牀下而涕淫淫越七日反流塘伏几下而涕淫淫卒不食而死

夫以聰明正直故通神明食犬如食人故及禽獸之
人也之德也其庶幾哉詹之後人非直仲子能也長
孫及吾門才美滋甚亦足爲王父尸舉宗將爲處士
祠奉處士血食墓去祠若干里得兆某山之陽門內
外親槩見志表不及碑碑其足術者如此

明賜級卓長公配朱氏合葬墓碑

余以乞碑適元美道出虎林光祿卓明卿挾筴而逆
之郊力有請也疇昔王先生志先妣墓爲之銘頃奉
考氏喪則又爲表乃今合塋有日美碑在明公余發
筴而手讀之則元美所稱載者甚且竊以卓長公概

先司馬生歿之年舉同歿以仲秋亦同長公僅先一日耳在禮近于親則敬余惡乎辭卓氏故籍瑞安三徙而贅唐棲宋氏蓋自靖難師入戶部侍郎敬死之于時族諸死難者家敬從弟敦去其族遂從婦姓籍仁和五世而長公生父曰賢母盛氏唐棲故通萬貨卓氏世受化居及父中衰長公舉夫一胡僧遭長公於市是宜尸蜀王孫邵康僖公數目長公斯其千乘器也同里朱氏系出徽國文公蓋自德清遷唐棲二姓世婚媾朱翁恒謂張母吾女非良士不家里中周媼攝蹇脩卓郎魁然良夫翁既聞胡僧語遂妻長公

時長公父服賈周游留滯濟上長公以孺子當戶力
詘而能舉羸孺人自梱內力作佐之不遺餘力長公
母老且痿子婦躬侍臥起手薦肯甘卽不支孺人脫
簪珥勿恤母病革執朱手呼天祝曰願而子而婦皆
若而人吾瞑地下長公故彊記則以賈廢儒夫婦相
與拮据業大起歲祀高禩弗驗孺人以爲憂陰媵邵
氏姬寘牖下卜日薦長公所謹擇宜子者御君長公
謝曰自若有家豈以糟糠康不造今壯夫吾寧有他
彊而一再御之遠弗邇孺人申請曰不宜胡子不邇
胡宜長公領之邵始當夕居有頃舉庶子文卿明年

舉適子明卿人言孺人後其身而身先是天道也卽長公以纖儉儕素封惟赴義爲汲汲管樹墓臯亭之麓奉王父母父母封焉諸田宅膏腴悉推而辨給諸母弟時張氏女弟破家人產長公授室居之張依孺人待而舉火歲再惡則平糶減市價什之三其不能糴者則設糜粥飼之殍則樁而掩之多全活客風長公公嘗粟何爲者也既不能乘人之急顧獨急所不知者何人諄夫長公避席曰某有天幸歲賜我贏卽損歲之贏與隣里共非詘也又因以爲利其若溝中之瘠何他若築堰甃陂梁津除道獨力治大善禪寺

其佑聖院永清庵僧累千百緡更僕可數凡諸義舉
率孺人力贊長公會隣人入舍胠篋竊貲舍人跡而
獲左驗孺人獨念與人同里如之何被人以盜名見
而佯驚此吾所遣齋而未發者耳二子始入家塾長
公諄諄申命之而父罷儒則代王父任家乘爾曹夙
夜外傳百慮不入于心所不力儒術以大吾門非丈
夫子比昏而入定則母氏焚膏課之迨夜分手啖嘍
之無及饑渴諸問左子弟或不能教長公爲之築學
舍延塾師無慮贅脩卽帷帳庖湍必備其後文卿領
鄉薦而明卿由太學授大官丞孺人弗逮夫孺人之

歿也悉出橐中裝授子舍中分之無私予殆若不知
明卿之爲已出也文卿之母孺人也無私恩殆若不
知其非孺人出也及文卿歿長公哭之哀明卿之喪
伯兄哀愈甚長公懼以伯故毀仲拊而寬之明卿則
以長子爾康後文卿事嫂如母拊孤女如已女長公
安矣中年內寵人二舉男子四曰彥卿達卿顯卿順
卿念諸孽子席故資或輕用之如委土吾耄矣何以
保終明卿日討諸幼而訓之于父母締造之不易也
長公益喜申誓之庭使諸少也才是爲仲也弟不則
將不爲仲也弟吾何子焉及明卿待次大官其游知

交多國士自昔用稱詩著諸作者益親明卿 上五
年詔舉民間高行賜爵一級郡縣大夫學官子弟三
老豪傑咸推轂長公尋得請部中授章服如令甲長
公一再御輒笥之郡縣通以鄉射賓長公長公一至
不再往鄉隣有構幸長公居其間旣解紛長公去而
弗有也居常衣大布飯脫粟出入不具牛車痺垣屋
去紛華徒以儉師後世而光祿交游滋廣高車結轍
於門長公蹶躅而伺大賓往往避匿年近大耄明卿
懼什七而喜什三歲時聚賓客奉長公出游或導之
前或擁之後僊僊乎適夫龍蛇之歲長公語明卿而

翁以八月大歸及期而信宣言我化殊樂手命諸子
婦毋號咷生平慕方外交宜若有得而朱孺人即世
蓋先長公者三十三年年莖四十五耳其生歿歲時
及子女婚嫁具志中夫年不必童而德童長公上壽
孺人未艾而隣是也德不必童而功童長公操下急
孺人濟之以寬是也功不必童而澤童長公六男而
四母則孺人爲之鴈鳩是也乃今合葬而碑之也於
法得銘銘曰山飽蹲鴟海飽鳥粒君子日間若一鹿
卓翩翩鹿門芟芟胡取乎三百廬棲谿之濱結嘉耦
梁爲賓孟爲友十年而皐又十年昌五十年至稱擅

塲乾坤定位六子良澤宮伯氏仲尚方誰其曰前報
王章斤斤然諾願秋霜繩繩子姓奉烝嘗在時之九
福履康蓬矢中命良弓藏楊山一杯有封馬鬣偕老
無疆于斯同穴

明故中順大夫南京太常寺少卿瑯琊王次公
墓碑

自平原著東吳季埒伯氏嘉隆之際三季代興雲間
從大宗伯則陸與成瑯琊從大司寇則王敬美太原
從少保相公則王家馭即三公鼎立三季並在鴈行
乃若席昌阜韞章相瑯琊尚美頃家馭即世次者與

成天不憖遺奄及敬美訃至長公屬不佞碑踰年而
狀始成累萬言皆實錄也即不佞無能爲役其何敢
辭王氏之居大倉自別祖崑山學正夢聲始至大父
倬歷南京兵部右侍郎父忬歷都察院右都御史近
奉 詔命贈兵部尚書母太恭人郁之自出嘉靖丙
戌長公元美生越十年丙申再乳敬美生而秀異中
膝下驪越十年以善病廢佔俾少間私治博士家言
大司馬見之大驚此吾家右廣也由諸生籍胄子受
經藝于庭戊午舉內史部中己未成進士比庭對奏
牘擅場睨者擠之列中下隸事邦政時省覲薊門會

虜入邊督府厲兵逐之北憾者從中坐逗遛鑄二階
仍嗾白簡逮京師以失守論季將從伯叩闕請代格
勿聞兩人日奉橐餕痛哭而籲當路議稍寢計坐園
土以待平反庚申公竟不免兩人匍匐歸櫬且奉太
恭人還吳依藁葬而居廬毀瘠過當敬美故孱弱幾
不勝喪太恭人手飼肉羹泣弗內喪畢乃始茹葷越
三年袁州敗徐文貞相穆宗與海內更始兩人始
赴闕白父寃旣而新鄭左文貞不宜暴先帝過羈
八閔月新鄭免歸邊臣勘功狀聞寃始白會留都臺
垣薦䟽入元美起家敬美未入部補南儀曹蓋異數

也居越歲北遷儀曹員外郎既奔太恭人喪若喪大
司馬服闋入補祠曹尋遷尚寶丞人人以卿材目敬
美劉御史即主嘗國遣緹騎逮之遼陽石廷尉上相
府書爲之解敬美從之相客李尚書所尚書億書出
王生既傳御史建言觸相怒下獄得戍敬美又從廷
尉爲治裝尋奉使使秦徙江西叅議抵藩入賀遇諸
憇者若兩忘既從趙直指按饒州 上遣中使逆江
陵太夫人乘六至江陵介弟通世講期一會於水濱
則以分部不得倍直指行致庖廩而已直指故伉直
多敬美有加尋以副使遷按察司主驛傳秋入監試

攝監司以上計行畢計臥病邸中疏乞骸骨江陵故
才敬美中奪壬人至是而釋然寢其奏太宰遣鄉人
風敬美且移學使山東敬美謝曰吾將以臬使休如
之何以學使起行矣朝車過故里幸得師事曇陽曇
陽遺之書訓以恬澹乃治澹圃奉其教行曇陽既出
世間敬美移陝西學使至元美方爲曇陽立傳屬敬
美手書授梓人望者揣江陵故槌兩公吊詭波及敬
美遂投劾乞歸人言南箕虛張罷弗竟敬美則以學
使者既煩頰舌其何以南面爲人師遂以單車行待
命境上會家馭亦謝河南學政翩翩並歸太宰故高

此兩人第學使俱上上敬美再辭浙江學使名益高
甲申冬復起福建元美扶義勸駕歲杪入閩試事竣
進左叅政分守福興道丙戌入賀敬美當行既遷南
京太常寺少卿猶奉表終藩臣禮禮成拜命 闕下
乃入官會所部上故督府功宜請 卹所部當其議
得 賜祭塋贈官敬美以不得從兄治兆域奉裸將
怏怏病矣尋予告痊則有司具奏起家敬美故饒吏
材不習而利魏公舉二庶長邦瑞幼邦寧公嬖鄭姬
而冒繼封意屬邦寧嫡矣誠意伯偵其狀語脇公公
寢不行伯乃詘反言故事公子當封者必入成均劉

端簡持正議筴公公以邦瑞應伯大失望謬結邦寧
而爲之謀吾故善大司成能爲若間六館有附伯者
並倡游言邦瑞年已及彊何以不稱胄子即邦寧毋
非嫡何以拜 天子誥稱國夫人大司成改慮而反
之復以二子俱請敬美攝儀曹事乃移文中府叅軍
鄭未封而邦寧生非嫡也無嫡立長何持兩端林少
宰乃大快王郎一言定國卒以邦瑞嗣公削伯祿屏
居及分道南康張直指行部至屬敬美旁治諸道諸
爰書率受成旣副監司驛傳方苦供億減損泰甚貌
道將不行乃下諸郡折其衷上所部絜爲令旣攝司

事兼署分巡即煩簿書辨應之如老吏據案草上下牘分曹遍錄不遑聚訟盈庭片言立決嘗署案獨一字不讐呼原案較之吏語塞此出後曹胥手耳悉付士師南昌李令虎而冠故用苛細稱上意敬美署之考借夏日刺之所部得其情乃劾罷令謝曰非公在事吾黨竟漏吞舟畢計入疆郵弊或仍其舊列款獨諸郡此乘我與諸君離事則然得蠹政者若而人爲之一洗嘗鞠父子訟者父辟子衷乃杖其子譙讓之已乃命杖其父子以身請代尋感悟無間言及持功令入閩秋期迫矣五月而畢諸以遺材求試者悉納

之令各署名卷角而自封悉罷編記試畢則授卷胥
史諸席家世挾私書署私名者棄不收諸鄉大夫爲
其子弟關說或介同鄉守令或抵開府中丞敬美畢
辭不少假資其年李光縉首舉是嘗困諸生而始擢
之越三年所試第一人皆入發敬美故善易兩主經
術益洽諸經先是元美攻古文辭傾當世士比在難
敬美與俱燕市悲歌間奏大司馬始爲泣下已復解
顏仲能爲伯氏箴吾家幸甚既而待命闕下刻意
稱詩南省游閒愈益肆力都市則宰詩社主齊盟蒞
奉常都人士迎謁恐後率目爲希有幸一觀之徵書

乞言日不暇給先是李于鱗爲作者冠目攝百家獨與元美齊鳴相爲鼓舞敬美始就草私質于鱗于鱗擊節賞之呼爲小美則謂小美真才子也伯仁不虞燎鬚邪元美報曰是夫沾沾醉鄉否幾及矣諸郎故從元美游者爲吳明卿宗子相徐子與張助甫張肖甫余德甫爭下敬美敬美與之抗衡居吳善俞仲蔚黃淳父周公瑕居朝善李本寧沈純甫黎惟敬歐禎伯居閩善陳玉叔其於不佞兄弟出入餘二十年尤急弱弟仲淹不啻左右手性故曠達習游觀近涉陽羨汎洞庭陟京口三山探金陵諸寺遠登泰岱憩靈

巖謁孔林北入闕登華嶽絕頂西北臨大漠南眺雪
山東俯中原僊僊乎大觀矣徑中南升大嶽帝時在
焉走龍門歷嵩少窮匡廬表裏之勝探九鯉湖諸山
之奇陶陶天游陶斯咏矣誦詩自周南以下迄于盛
唐不徑不庭務求神造凡諸近體七言尤工爲文奧
主兩都昌黎廬陵亦在初繹旁搜世說自以爲得三
昧而手批之少耽六書工行草小隸深譚二氏不墮
言筌未著澹思子望崖編庶幾得西來意元美爲之
集遺藁五十卷颯颯乎成一家言所著有經子臆解
閩部疏三郡圖說學圃雜疏窺天外乘二酉委談其

緒餘也積勞蓄火中轆而上騰久之噎矣顧不穀而
神王載筆無慮萬言會歲浹饑倡發粟以糜饑者大
作佛事度溝壑登菩提宣言自今待期無壅礙矣病
間復作信宿而殊彊起屬書與長公訣比從師門得
定力不住生死心世懋將反故吾不復知有兄在病
革諸子問昏散否曰無念何所昏散嗒焉而終春秋
五十有三其日則閏月幾望狀言敬美居庭孝友善
承歡嚴伯兄近于嚴君率先意曲中梱以內莊安人
章日課諸子程督之沒身不倦長太學生士駟次州
學生士駟斐然競爽次士駟次士駟並以幼清見奇

次公故號麟洲居然趾振振矣其姻氏則袁學使沈
光祿史司隸韓宗伯婚氏則楊觀察凌圻父楊司馬
趙秩宗二姓之驩率以禮義相肺腑居常重名教出
入必軌于人倫古之不朽者三什得五六德不必曾
史徵之躬行功不必公孫僑徵之吏治言不必漢司
馬徵之雅馴假以天年殆未知其所息跼即長公難
爲弟不亦季方乎哉墓在州城東鄉兆尚書公右南
鄉三世九列若堂若坊斯可九原觀矣

有唐黃孝子廬墓墓域碑

於乎此有唐處士光之墓孝子芮之所廬者也處士

家黃潭遷自祁門而本江夏孝子生有至性母程歿繼以洪洪病殊刲股以羹獻嘗而勿藥病遂平比居父喪哀毀過當北渡潭陰卜兆奉父母喪合葬後林倚廬而居以永終慕芝出墓下者十四本墓木連理者四枝貞元十九年刺史盧肇上其事德宗下詔旌表復故居地勿徵歷朝迄今因之具新唐書一統志及郡志督學御史陳選檄祀鄉賢祠子孫相依周廬世守歷年八百聚食千人顯者代興邑人稱潭渡曰孝行里萬曆庚寅冬二月郡守董石縣令彭好古循行里中四望徘徊合語鄉社衆之本教曰孝先王至德

要道在焉屬左司馬汪道昆勒之碑以風境內銘曰
城烏屋烏孰如顏也烏芝有房木有祥譽命有章孝
烏其有光

太函集卷之六十七

終